

Program BA100 mampu turun harga barang

➔ MTSHN teliti inisiatif kurang peranan orang tengah

Oleh Irwan Shafrizan Ismail
irwansha@nstp.com.my

Putrajaya

Majlis Tindakan Sara Hidup Negara (MTSHN) akan meneliti pelaksanaan inisiatif Program Barang Asas 100 (BA100) yang dijangka boleh mengurangkan harga barangan dan peranan orang tengah serta mengeluarkan sendiri barangan keperluan asas.

Timbalan Perdana Menteri, Datuk Seri Dr Wan Azizah Wan Ismail yang mempengerusikan MTSHN, berkata pelaksanaan BA100 membabitkan Kementerian Pembangunan Usahawan, Kementerian Pertanian dan Industri Asas Tani dan Angkatan Koperasi Kebangsaan Malaysia Bhd (Angkasa) dalam usaha kerajaan menangani kos sara hidup.

Katanya, koperasi yang mempunyai seramai 6.1 juta ahli setakat 30 Jun 2018, dapat memainkan peranan penting untuk membantu kerajaan menangani kos sara hidup melalui program pembangunan pemborongan, peruncitan dan pertanian.

“Melalui pemborongan dan



[FOTO AHMAD IRHAM MOHD NOOR /BH]

Dr Wan Azizah mempengerusikan mesyuarat ketiga MTSHN di Putrajaya, semalam.

peruncitan, ia membabitkan pengukuhan dan pemantapan pusat pengedaran koperasi. Peruncitan membabitkan pembangunan produk koperasi. Pertanian pula membabitkan penternakan, perikanan, sayur dan buah dan input pertanian,” katanya.

Beliau bercakap pada sidang media selepas mempengerusikan mesyuarat ketiga MTSHN di sini, semalam. Yang turut hadir Menteri Dalam Negeri, Tan Sri Muhyiddin Yassin; Menteri Perdagangan Dalam Negeri dan Hal Ehwal Pengguna, Datuk Seri Saifuddin Nasution Ismail dan Menteri Pembangunan Usahawan, Datuk Seri Mohd Redzuan Mohd Yusof.

Sementara itu, Saifuddin Nasution menjelaskan BA100 adalah 100 barang asas termasuk

tepung, gula, beras serta barangan yang biasa dibeli orang ramai hasil pemerhatian yang dibuat pihak koperasi.

Kembangkan program QFish ke seluruh negara

“Ideanya adalah jika mereka boleh senaraikan 100 barang asas ini dan menguasai ekosistem yang meliputi pemborongan, pengedaran dan peruncitan dan mempunyai kedai, maka 100 barang ini dapat dijual di kedai mereka dengan harga yang lebih rendah,” katanya.

Dalam pada itu, Dr Wan Azizah berkata MTSHN juga bersetuju untuk mengembangkan program QFish ke seluruh negara dengan mengguna pakai teknologi pembekuan ikan secara *Individual Quick Freezing* da-

lam membantu kerajaan menstabilkan harga ikan di pasaran.

“Program QFish ini menyasarkan untuk meningkatkan pengeluaran kapasiti ikan daripada 561 tan (MT) kepada 3,500 MT setahun,” katanya, sambil menambah usaha itu juga adalah untuk mengekang masalah kekurangan ikan di pasaran.

Dr Wan Azizah turut mengumumkan pelantikan lima anggota baharu MTSHN iaitu Menteri Perdagangan Antarabangsa dan Industri, Datuk Ignatius Darrrel Leiking; Peguam Negara, Tommy Thomas; Ahli Parlimen Jeli, Datuk Seri Mustapa Mohamed; Ketua Pegawai Eksekutif Malaysia Digital Economy Corporation Sdn Bhd (MDEC), Surina Shukri dan Presiden Majlis Belia Malaysia, Jufitri Joha.